



## ADRIATIC METALS BH NASTAVLJA S OSNAŽIVANJEM BUDUĆIH RUDARA

Adriatic Metals BH ponosno potvrđuje svoju predanost podršci budućim generacijama rudarskih stručnjaka dodjelom stipendija za pet srednjoškolaca upisanih u program "Rudar u podzemnoj eksploataciji".

Ova inicijativa odražava predanost kompanije poticanju obrazovanja, osiguravanju kvalificirane i sposobne radne snage za budućnost. Program stipendiranja, osmišljen kako bi se učenicima pružila podrška, koja će im omogućiti sticanje srednjoškolske diplome neophodne za nastavak obrazovanja. Izvršna direktorica, Sanela Karić je u prostorijama Informativnog centra ugostila učenike, čestitala im na postignućima i ohrabrila ih da odlučno slijede svoje snove. Događaj je također istaknuo ulogu Informativnog centra kao mosta između lokalne zajednice i kompanije. Adriatic Metals BH ostaje predan svojoj misiji osnaživanja pojedinaca, inspiriranja zajednica i unapređenja industrije kroz značajne inicijative.

# PARTNERSTVO ADRIATIC METALS BH I FK ŽELJEZNIČAR – ULAZNICE ZA SVE UČENIKE OPĆINE VAREŠ

Kroz sponzorstvo nogometnog kluba Željezničar, kompanija Adriatic Metals BH velikodušno je osigurala besplatne ulaznice za učenike osnovnih škola Vareša i Vareš Majdana, uključujući sve učenike iz područnih škola, za povijesnu nogometnu utakmicu između NK Vareš i FK Željezničar, Sarajevo.

Ova inicijativa izazvala je veliko uzbuđenje među djecom, njihovim roditeljima i lokalnim ljubiteljima sporta. Posebna delegacija nogometnog kluba Željezničar, 6. februara 2025., posjetila je Osnovnu školu Vareš i Osnovnu školu Vareš Majdan kako bi lično podijelili ulaznice učenicima. Tokom ovog događaja, učenici su imali jedinstvenu priliku upoznati igrače, prikupiti autograme i fotografirati se s igračima ekipe Željezničara. Svaki učenik dobio je dvije ulaznice – jednu za sebe i jednu za roditelja ili skrbnika – kako bi osigurali da zajedno podijele nezaboravno iskustvo gledanja sporta uživo.



Ukupno je podijeljeno više od 700 ulaznica, omogućivši značajnom broju djece da dožive čaroliju ovog događaja. Osim toga, kompanija je velikodušnu gestu proširila i na svoje zaposlenike, osiguravajući ulaznice svima koji su bili zainteresirani.

# ODRŽANA DESETA SJEDNICA ODBORA ZA ODNOS S LOKALNOM ZAJEDNICOM

U sali Općine Vareš, dana 27.02.2025., održana je deseta sjednica Odbora za odnose s lokalnom zajednicom kompanije Adriatic Metals BH.



Na sjednici su razmijenjene ključne informacije o trenutnim projektnim aktivnostima i budućim planovima. U fokusu sjednice bili su izvještaji o realiziranim društvenim, edukativnim, sportskim i okolišnim aktivnostima, uključujući zdravstvene edukacije, donacije i osiguravanje podrške lokalnim studentima i sportistima. Podijeljena je i informacija o pripremi izvještaja o ugljičnom otisku. Također, za kraj mandata aktuelnog saziva Odbora, predstavljen je i plan posjete Odbora za odnose s lokalnom zajednicom, rudniku Rupice.

Realizacija još jedne uspješne sjednice Odbora za odnose s lokalnom zajednicom dodatno je naglasila značaj otvorenog dijaloga u izgradnji održivih društvenih promjena.

## VOLIM PRIRODU – VOLIM VAREŠ

Pod sloganom Volim prirodu – volim Vareš, odred izviđača Zvijezda Vareš i Općina Vareš u suradnji s Adriatic Metals BH, organizirali su još jednu proljetnu akciju čišćenja grada i zelenih površina uz regionalni put R444 prema Brezi. Cilj akcije bio je podizanje svijesti o zaštiti okoliša i inspiriranje drugih da budu odgovorniji. U realizaciji akcije sudjelovali su OI "Zvijezda" Vareš, uposlenici Adriatic Metals BH, NK Vareš, Karate klub "Vareš", Fondacija Adriatic, Lovačko društvo "Zvijezda" i stanovnici mjesnih zajednica Vareš Majdan i Dabravine. Sudjelovanje preko stotinu volontera oslikava snagu zajedništva, ostavljajući trajan pozitivan uticaj na zajednicu i odnos prema životnom prostoru.



Kompanija Adriatic Metals BH zapošljava 558 radnika. Od ovog broja, 388 radnika (69%) je iz Zeničko-dobojskog kantona, a 231 radnik (41%) je s područja općine Vareš. Također, ponosni smo na činjenicu da 132 žene (24%) čine radnu snagu našeg kolektiva

Želimo istaknuti i našu kontinuiranu predanost razvoju lokalnih zajednica. U narednom periodu, planiramo niz aktivnosti koje podrazumijevaju interakciju s lokalnim zajednicama, kako bismo predstavili Adriatic Metals BH i potencijalne karijerne prilike, te omogućili potencijalnim zainteresiranim kandidatima da razgovaraju s predstavnicima naše kompanije. Zato smo organizovali kampanju pod nazivom Zajedno gradimo budućnost, u kojoj želimo predstaviti kompaniju i otvorena radna mjesta, predstaviti mogućnosti učenja i napretka, dati korisne savjete vezane za vještine intervjuisanja. Naše druženje u Varešu smo zakazali za **4.4.2025. u Adriatic Metals BH Informativnom centru, od 9 do 15 sati**. Veselimo se razgovorima s cijenjenim članovima naše zajednice i našim potencijalnim kandidatima.



# LIVING HISTORY PROJECT

## Nikolina Erlbek

Direktorica Javne predškolske ustanove "Dječije obdanište Vareš"

**Prije svega, želim da Vas pozdravim i zahvalim što ste pristali govoriti za naš bilten, a koji je dio našeg projekta „Living History Project“. Za početak, recite nam nešto više o Vašem karijernom putu?**

Moj put u odgoju i obrazovanje predškolske djece počinje u Sarajevu na Pedagoškom fakultetu na kojem završavam smjer Predškolski odgoj kao najbolji student generacije i s nagradom Srebrna značka Univerziteta u Sarajevu. Po završetku fakulteta volonterski odrađujem pripravnički staž u PPU "Srce", kasnije preimenovanoj u PPU "Egipat" na Bjelavama. U istoj ustanovi ostajem kao glavni odgajatelj nepunih osam godina. 2023.godine pružila mi se prilika da se vratim u Vareš i pridružim timu JPU "Dječije Obdanište Vareš" kao direktorica ustanove koju sam i sama pohađala kasnih 80ih.

**Šta Vam predstavlja najveće zadovoljstvo u svakodnevnom radu s djecom?**

Najveće zadovoljstvo u svakodnevnom radu s djecom predstavlja mi misao da učestvujem u oblikovanju malih znatiželjnih umova, kao i činjenica da svaki moj postupak ostavlja pečat na njihov budući život koji će nastaviti van vrtića. Odgoj i obrazovanje nije zanimanje, to je poziv s kojim se rodite i od toga ne možete pobjeći nikada.

**Jedna ste od rijetkih ustanova u FBiH koja je akreditirana za realizaciju programa: "Odgojno-obrazovna ustanova – prijatelj zdrave ishrane", šta to znači u praksi i kako su djeca prihvatila program?**

U praksi to znači svakodnevno pronalaženje novih i kreativnih načina da zdrave namimice i zdrave obroke uključite u dječiji meni. Izazovno je i povremeno stresno pokušati uvesti promjene i novine kod djece koja su već vrlo isključiva po pitanju toga šta vole jesti, a šta ne. Tako da je to prije svega svakodnevni i strpljivi rad na proširivanju dječije palete okusa, a povremeno i borba s vjetrenjačama.

**Postoje li neki novi planovi ili aktivnosti koje namjeravate implementirati?**

Nadamo se da ćemo uspjeti produžiti akreditaciju prijatelja zdrave ishrane i ove godine, te da ćemo dobiti priliku da učestvujemo i u drugim projektima. Naši trenutni planovi se odnose na mogućnost proširenja naše ustanove, jer se za boravak u istoj svaki dan traži mjesto više. Naši sadašnji prostorni i kadrovski kapaciteti su maksimalno popunjeni, i ne možemo ići u korak sa potražnjom koja trenutno vlada.



**Rudnik Adriatic Metals BH je otvoren prošle godine, na koji način je to uticalo na rad vaše ustanove?**

Moram biti iskrena i reći da je sa otvaranjem novih radnih mjesta došlo i do povećane potražnje za mjestom u vrtiću. Mnoge naše sugrađanke i sugrađani su zaposleni u kompaniji Adriatic Metals BH, te su možda po prvi put imali potrebu da potraže pomoć vrtića u brizi za njihovu djecu. Isto tako, u naš grad su se doselile porodice iz drugih krajeva BiH, koje su također prepoznale važnost boravka njihove djece u našoj ustanovi.

**Da li ste morali praviti određene operativne ili infrastrukturne prilagodbe?**

Naravno. Do prije dvije i po godine vrtić je funkcionisao samo s jednom odgojno-obrazovnom grupom. Velika potražnja za vrtićem uzrokovala je otvaranje prvo jedne jasličke grupe, kao i još jedne mješovite vrtićke grupe, godinu dana kasnije. Trenutno našu ustanovu pohađa 60 mališana smještenih u tri odgojno-obrazovne grupe.

**Da li ste surađivali s kompanijom Adriatic Metals BH?**

Kompanija Adriatic Metals BH je od svog početka pokazala zainteresiranost za rad naše ustanove, te su ga podržali organiziranjem predavanja i radionica za djecu i roditelje, donacijama prazničnih paketića za svu našu djecu kao i pozivima na sva dešavanja koja organiziraju u gradu.

**Koji su to najveći izazovi s kojima se susrećete u svom radu?**

Najveći izazovi trenutno su vezani za nedostatak stručnog kadra. Hroničan nedostatak odgajatelja, ne samo u Varešu, nego u cijeloj državi dovodi do preopterećenosti odgojnih grupa, kao i postojećih odgajatelja. Ovo je jedan izuzetno težak i odgovoran, a vrlo često i nedovoljno cijenjen posao. Smatram da se premalo ulaže u granu koja čini temelj društva. Nadam se da ću do kraja svoje karijere doživjeti promjene koje moje kolege i ja priželjkujemo već godinama.

**Prema Vašem mišljenju, na koji način bi kompanija, u budućnosti, mogla podržati vrtić, a i zajednicu?**

Svi smo svjesni da naša ustanova treba veliku pomoć. Sama zgrada je u gotovo u cijelosti u onakvom stanju kakva je od samog početka svog djelovanja 1974.godine, te su izvršene minimalne rekonstrukcije i obnavljanja. Naša trenutna finansijska situacija ne omogućava da riješimo sve probleme koje imamo, te se nadamo da ćemo u tom pogledu moći računati na pomoć kompanije Adriatic Metals BH kako bismo unaprijedili naš rad i ponudili našoj djeci još bolji i kvalitetniji boravak u našoj ustanovi.

**Hvala Vam na izdvojenom vremenu.**

Hvala Vama na pozivu na ovaj intervju i interesovanju za rad i dobrobit naše ustanove.

